

Das ander tayl.

Das ander tayl ist von fleisch speyß.

¶ Das erst Capitel.

¶ Item der ein gut essen von hünern machen wil der thu also. Wenn die recht vñ wol gesoten seind, so zerleg sie in vierteyl, nim das Bretig vnd hach es vñ stoß es wol in einem möiser also, nym haubt, Kragen vnd alles eingereusch, das hach vñ stoß damit, Nym ayer, Peterlein vnd auff zwen löffel vol weyß melbes das schüt daran mit wasser oder mit wein gegilbt mit saffran, So das alles wol gestossen ist, so thu es auß, vnd nym die andern glider der hünere vnd beschlag sie mit gestossenem teyg vmb vñ vmb, yedes stück gleich als Kuchlein, netz die hende in wein, streichs wol zu vmb vnd vmb, legs in die alten hünere, Brü in ein weyten hasen, das auch die selbig Brü darüber gee vñ laß es auch also sieden. Auch wiß das die alten feyten hünere gut darzu sind so es nun gesoten ist, so mach die Brü mit würtzen vnd saltz, strew Peterlein darüber klein gehackt, vñ richte es an, wiltu das besser haben so nim feygē vñ weinberlein in das geheck kaum zubrieffen vñ wie Klein glider seind, so sol man doch yedes besunder vmb schlahē vñ einlegen ein solch geheck on mel möcht man zu guten hünern füllen machen.

¶ Das ander Capitel.

¶ Item wiltu machen hünere fül, so laß die leberlein vnd meglein vor wol sieden, vnd hach sie klein in die fül, da mustu essig vnd rauten zu haben, vñ pfeffer ist jr würtz der sie gern ist, das gehört groben leuten

¶ Das dritt Capitel.

¶ Item wilt du ein gut hun sieden oder braten oder füllen, so bereyte das hun gar schön vnd weyden es, vnd schürpff die derm, vnd nym kopff, Kragen, leber, magen vnd alles ingeweyt, vnd seud es in einem hasen oder in einer pfannen an die stat, das hach wol mit Peterlein, schlag rohe ayer darein, vnd würtz ab vnd saltz es, hach ein alt specklein darunter, vnd klein weinber oder gebraten Biren, das knit gar wol vnter einander, das ist also die fül. Ist dann nun bereyt das hun, entplöß es wol vmb vnd vmb, vnd fül es schön mit einer feyt farb, strick es zu vnd erwelle es in wasser da wein vnd effig innen sey, das

D